

乾隆韓城縣志

聞人

韓城縣志卷六

賢良

漢司馬遷字子長龍門夏陽人其先蓋出自重黎之苗裔世序天地在周則程伯休甫其後也宣王時失其守爲司馬氏司馬氏世典周史惠襄之間去周適晉晉中軍隨會奔秦而司馬氏入少梁自司馬氏去周適晉分散或在衛或在趙或在秦在衛者相中山在趙者以劍論顯蒯瞶其後也在秦者名錯卽與張儀爭論伐蜀者錯孫靳事武安君白起而少梁更名曰夏陽靳與武安阬趙長平軍俱賜死杜郵葬於華池靳孫昌爲秦主鐵官始皇時蒯瞶元孫卬爲武信君將而徇朝歌諸侯之相王王卬於殷漢之伐楚卬歸漢以其地爲河內郡昌生母懌母懌爲漢市長母懌生喜喜爲五大夫卒皆葬高門喜生談談爲太史

公太史公仕於建元元封間嘗論六家要指辯陰陽儒墨名法而歸於道德有子曰遷遷生龍門耕牧河山之陽年十歲則誦古文二十而南遊江淮上會稽探禹穴闕九疑浮於沅湘北涉汶泗講業齊魯之都觀孔子之遺風鄉射鄒嶧厄困鄒薛彭城過梁楚以歸於是遷仕爲郎中奉使西征巴蜀以南南略邛笮昆明還報命是歲天子始建漢家三封而太史公畱滯周南不得與從事發憤且卒而遷適使反見父於河洛之間太史公執遷手而泣曰余先周室之太史也自上世常顯功名於虞夏典天官事後世中衰絕於予乎汝復爲太史則續吾祖矣今天子接千歲之統封太山而余不得從行是命也夫命也夫予死汝必爲太史爲太史無忘吾所欲論著矣且夫孝始於事親中於事君終於立身揚名於後世以顯父母此孝之大者夫天下

誦周公言其能論詩文武之德宣周召之風達太王王季之思
慮爰及公劉以尊后稷也幽厲之後王道缺禮樂衰孔子修舊
起廢論詩書作春秋學者至今則之自獲麟以來四百餘歲而
諸侯相兼史紀放絕今漢興海內一統明主賢臣忠臣死義之
士余爲太史而弗論載廢天下之史文余甚懼焉汝其念哉遷
俯首流涕曰小子不敏請悉論先人所次舊聞弗敢闕談卒三
歲遷爲太史令紬史記石室金匱之書五年而當太初元年十
一月甲子朔旦冬至天歷始改建於明堂諸神受紀於是論次
其文七年遷以救李陵遭禍幽於縲絏茸以蠶室乃喟然而嘆
曰是余之罪也夫是余之罪也夫身毀不用矣退而深惟曰夫
詩書隱約者欲遂其志之思也遂卒述陶唐以來至於麟止自
黃帝始綱羅天下放失舊文稽其成敗興壞之紀爲十表本紀

十二書八章世家三十列傳七十凡百三十篇五十二萬六千五百字名曰史紀而十篇缺有錄無書元成之間褚先生補之作武帝紀三王世家龜策日者列傳今並在史紀中遷被刑後爲中書令尊寵任職其故人益州刺史任少卿安子書責以古賢臣之義遷報以書語多激昂感慨蓋憤世嫉俗與貨殖遊俠刺客諸傳相表裏焉遷卒葬高門東南八里嶺上東望黃河一邱歸然遷之書死後方出宣帝時遷外孫平通侯宏農楊惲每祖述之其書遂得宣布王莽時封遷後爲史通子而晉永嘉四年漢陽太守殷濟瞻仰遺文大其功德遂於遷墓上建石室立碑樹栢栢至今蒼然遍山谷云

北魏薛麟駒其先汾陰人以伯父洪祚尚魏文帝女西河公主有賜田在馮翊遂徙家馮翊之夏陽舉秀才拜中書博士齊使

至詔兼主客郎中以接之卒贈河東太守諡曰宣長子慶之頗有學業位廷尉左丞賜爵龍邱縣子次子英集性通率以軍功累至治書侍御史通直散騎常侍

後周薛端字仁直集之子少有志操勵精篤學不交人事年十七司空高乾辟爲參軍賜爵汾陰縣男端以世亂棄官歸里孝武西遷東魏遣行臺薛循義等率衆數千西渡據楊氏壁端與宗親及家僮戰走石城橋並力固守魏將懼而東遁端收其器械復還楊氏壁太祖降書勞問徵爲丞相府戶曹叅軍從擒竇泰復宏農戰沙苑並有功進爵爲伯轉丞相東閣祭酒加本州大中正遷兵部郎中加使持節平東將軍吏部郎中端性彊直每有奏請不避權貴太祖嘉之故賜名端大統十六年大軍東討以端爲元帥李弼長史累加車騎大將軍儀同三司轉尚書

左丞仍掌選事已進吏部尚書賜姓宇文氏端久在選曹雅負藻鑒所用皆有名蹟其才行薄劣者雖貴遊子弟未嘗升擢孝閔帝踐祚進公爵增邑至千八百因忤晉公護出刺蔡州政尚寬惠民吏愛之尋轉基州未幾卒遣誠薄葬母受府州贈遺計開贈本官加大將軍追封交城郡公諡曰貞

隋薛胥字紹元端子少穎敏綜覽羣籍暢達政事嘗慷慨欲立功名周末襲爵夾城郡公文帝擢檢校廬州尋除兗州刺史郡有滯獄數百胥不旬日決之囹圄空虛陳州人何道元詐爲高平郡守胥途遇察其有異收而發之人稱神明先是城東沂泗二水合而南流汎濫大澤中胥積石堰之使令西注陂澤盡爲良田又通轉運百姓賴之號薛公豐堯渠後刺郢州徵拜衛尉卿尋轉大理選刑部尚書以議雪高顯獄忤旨出檢校相州皆

有能名會漢王諒作亂遣偽將綦良攻胄胄以計說良得釋去
及良敗棄軍歸胄朝廷以胄懷貳心繫大理相吏人詣闕理者
百餘人竟坐除名配防嶺南道卒子筠獻並知名

唐白居易字樂天其先蓋太原人北齊五兵尚書建有功於時
賜田韓城子孫家焉又徙下邳父季庚爲彭城令居易敏悟絕
人工文章貞元中擢進士拔萃補校書郎元和元年對制策乙
等調藍屋尉爲集賢校理月中召入翰林爲學士遷右拾遺後
貶江州司馬久之徙忠州刺史入爲司門員外郎以主客郎中
知制誥轉中書舍人文宗立以秘書監召遷刑部侍郎封晉陽
縣男太和初除太子賓客分司踰年卽拜河南尹復以賓客分
司開成初起爲同州刺史不拜改太子少傅進馮翊縣侯會昌
初以刑部尚書致仕年七十五卒贈尚書右僕射諡曰文居易

被遇憲宗時事無不言多見聽可然爲當路擯斥所蘊不能施乃放意文酒嘗與胡杲吉皎鄭據劉真盧真張渾狄兼謨盧貞燕集皆高年不事者人慕之繪爲九老圖其始生七月能展書姆指之無兩字雖試百數不差九歲暗識聲律工於文章蓋天稟然贊曰居易始以直道奮在天子前爭安危冀以立功雖中被斥晚益不衰當宗閔時權勢震赫終不附離爲邁取計完節自高鳴呼居易其賢哉

宋張昇字杲卿韓城人舉進士爲楚邱主簿南京雷守王曾稱其有公輔器累官度支員外郎夏竦經略陝西薦其才換六宅使涇原秦鳳安撫都監未幾以母老求歸故官得知絳州改京西轉運使知鄧州又以母辭或指爲避事范仲淹言於朝曰張昇豈避事者乃許歸養歷戶部判官開封府推官至知雜御史

張堯佐緣恩驟用知開封府內侍楊懷敏夜直禁中而衛士爲
變皆極論之昇性質樸不善擇言至斥張貴妃爲一婦人謂懷
敏得志將不減劉季述仁宗讀之不憚以語陳升之升之曰此
忠直之言不激切則聖意不可回矣帝乃解以天章閣待制知
慶州改龍圖閣直學士知秦州初青唐蕃部蘭羶世居古渭積
與夏人有隙懼而獻其地攝帥范祥無遠慮亟城之諸族畏其
偏舉兵叛昇至請棄勿城詔戶部副使傅求審視之以爲不可
棄與昇議殊先是副總管劉渙討叛羌逗撓不時進昇命他將
郭恩代之羌乃潰去渙黜其功調訟恩多殺老稚以撼昇朝廷
命張方平守秦徙渙涇原亦徙昇青州將罪昇方平辭曰渙昇
有階級今互言而兩罷帥不可爲也昇乃復畱至和二年召兼
侍讀拜御史中丞劉沆在相位以御史范師道趙抃嘗攻其惡

陰欲出之昇曰天子耳目之官柰何用宰相怒而斥上章力爭之沆竟罷去帝見昇指切時事無所避謂曰卿孤立乃能如是對曰臣仰託聖主致位侍從是爲不孤今陛下之臣持祿養望者多而赤心謀國者少竊以爲如陛下乃孤立爾帝爲之感動契丹主宗眞遣使齎其畫像來求帝畫像未報而死子洪基立以爲請詔昇報聘諭使更致新主像契丹欲先得之昇曰昔文成以弟爲兄屈尚先致敬况今爲伯父哉遂無以奪乃復以洪基像來嘉祐三年擢樞密副使遷參知政事樞密使昇愛惜官資凡內降所與多持不下見帝春秋高前後屢進言儲嗣事卒與韓琦同決策英帝立請老帝曰太尉勤勞王家詎可遽去但命五日一至院進見無蹈舞司馬光上疏言近歲以來大臣年高者皆不敢自安其位言事者欲以爲名又從而攻之使其人

無可取雖少壯何益果有益於時雖老何傷昇爲人忠謹清直不可干以私若使且居其位於事亦未有曠廢也昇請不已始賜告令養疾遂以彰信軍節度使同中書門下平章事判許州改鎮河陽三城拜太子太師致仕熙寧十年薨年八十六贈司徒兼侍中諡曰康節

明王盛字懋德號竹室韓之澗南里人成化乙未進士任戶科給事中山西布政司叅政嘗受業文清公之門孝友嫻恤俸祿之入盡以散族人親識家無餘貲行部河東韓人有見者延款無倨色閭里相傳以爲榮幸過汾陰謁后土廟見側祠有十六羅漢像去之有狄梁公之風韓俗喪葬媚佛盛非之獨祖奠以禮白是士遂移風焉先成化甲午薛封池蓮一莖雙花乙未春盛與馮義成進士先後俱授給事人以雙花爲瑞蓮謁盛記

之盛以花雙而實異因記以自勗其略曰彼澤之陂有蒲與荷
荷芙蕖也其華茵萏其實蓮以蓮花爲君子者周濂溪也以蓮
花爲淨友者曾端伯也此興之義士當以之今韓之蓮一莖雙
花瑞也願實有不同焉可繹也何也科之登也同也得其人則
足正君善俗則足修政立事而祿位崇焉此蓮房之大而實者
若以示勸也非其人則名實未加於上下責任空託於一身而
卑黜隨之此蓮房之小而未實者若以示戒也繹示戒而戒之
繹示勸而勸焉堯舜吾君民位育吾寰區如此則器之成也大
而人與蓮並瑞矣此盛之文詞概見者也據此一瓣而測之盛
其卓犖士哉其沒世不忘也殆桃李之下成蹊乎

張士佩字玟父號漣濱生而奇穎中嘉靖丙辰進士授紹興推
官試得羅萬化朱廣等數十人教育於稽山書院有大拜及魁

天下者同考鄉試所得悉一時知名士徵拜御史每疏入肅皇
帝輒報可所論皆當世急務而三途並用與衙門陞遷之議尤
爲當世所避南大司馬克齋李公讀其疏喟然曰如此天下太
平矣又劾奏嚴世蕃之黨羅龍文等力逮治罪天下快之以內
外艱歸廬墓五年巡按山東安戢遯左流移日照尹廉而才以
催科不及第下等公破例拔薦後爲名諫議遷江右憲副守嶺
北土寇葉楷作亂劫司李賴萬璵爲質急則賴不可保公佯檄
數賴不職事遂還之因進兵平焉又有盜當三省交囂聚幾百
年公建議設州於程鄉興寧安遠武平四縣間遂無叛者調晉
浙以汾水汎濫沒民田歲爲害乃築陂瀦水以時蓄洩反成腴
壤二千餘頃長憲齊魯逮章邱樓霞等墨吏按治之羣吏肅然
北境多盜公廉得主者二十餘家論如法而榜其名盜竟絕跡

爲晉藩左轄諸郡上折稅銀不啓封卽行轉解省民財以巨萬
歲得羨金萬餘悉登籍晉土多瘠爲別三等輸賦疲邑賴之開
府西蜀奉旨丈地力任勞怨得伏田二十七萬餘頃糧地均平
重賦者緣是得蘇蓋公於晉嘗減武鄉沁源諸邑賦額於齊減
魚台等邑馬價以故三方皆尸祝云長官司土舍阿祭行萬金
賄謀冒襲假助糧以入公毅然曰奴敢以是污我耶遂治其罪
天全司土舍楊時春以庶孽謀襲殺應襲者遂作亂公檄討之
生擒時春等斬之天全遂平定永寧宣撫司土婦奢世續爭印
讐殺董卜作亂於灌縣烏慮兵擾於烏蒙丹維屏固違截處皆
一一討平成都兵當戍威茂監司發餉稍遲遂甲而譁公關門
呼入衆尚操兵公曰此非副使所得主吾當給之又曰譁者於
軍法當杖遂杖其首者四十居數日得倡亂六人斬於市衆皆

張栗應變之智人以其爲如宋張公誅之在益州也召爲天官少
宰仍申三途並用法一意進賢退不肖所見多與新冢宰左
遷南大司徒稱疾乞致仕久之起督倉場而公去志益決矣平
生篤信理學與天臺耿公研性命之理所著有洗心恒性中庸
大指忠恕違道不遠道自道成已成物夫焉有所倚復禮見學
諸說心性人心道心格物諸辯皆暢發前賢之旨他所輯有六
書賦洪武正韻玉鍵及達意稿四書端蒙錄留臺類稿山東按
奏西蜀題奏韓城縣志諸書致仕家居逾二紀而終誥贈太子
少保致祭營兆域公嘗自謂吾居官不取贖錢遷官不用賄賂
居鄉不行請託三事可對天日人以爲確其撫蜀也江陵方在
政府奇公才甚相倚重請所設施從無掣肘以故機宜動中公
得盡所欲爲云歷官所餘俸悉推孤姪及故舊親戚家無餘貲

嘗引水鑿山開陶渠瘠地致可藝稻梁數十頃築北園讀書其中性好學手不釋卷

薛亨字道行韓城郝庄里人也上世有兄弟三人出粟賑饑以義民旌數傳至王父珉父三戒以公贈山西提學僉事始生時父母夢天門開卿雲奉日而墜於懷奇之六歲授書千言成誦會苦大徭走之臨鎮設館胡家王父病執其手而語之爾必歸吾骨首邱公泣受命十六隸諸生籍家赤貧讀書圓覺寺僧夙夜起鳴鐘必聞公書聲嘆曰卽吾黨苦行不若是寒忘求衣餒忘求食篝燈忘焚其冠於路默誦腹笥逢所知若不識或就而揖不交一語里人程公張公見其文歛衽服之守梁公倅黃公都肆諸生目公秦士無雙聞其未受室也屬縣令王公擇名門女而得衛氏爲具六禮以婚辛酉用尚書舉泰第一人甫弱冠

耳更十年成進士授戶部主事督餉寧武徙內庫於外以示辟
遠不義設郡倖司出納故事餉賦金賦粟各半屬虜坎冬戍河
卒夏復築堤請倍給餉或議加賦公不可裁甲馬芻秣之溢額
者畀之大司徒嘉其能著爲令改兵部武選司以父喪歸服除
除車駕司奉使稿邊道遷刑部員外郎尋擢山西提學僉事教
先德行而後文藝暇則登進諸生談經術日仄不倦而以齋膳
之羨置學田周士不給者以母喪歸子婚有期緩之俟三年而
遷葬王父如諾里人若隣邑士來受業成名者甚衆服除除故
官值大比士屢試不憚煩得人爲盛所著晉學政校士錄晉學
申諭原教錄四先生語錄理學詩學海叢珠至今誦之遷山東
少叅督泰山香稅屬歲禮以市粟賑饑市牛助耕無何遷楚副
憲過家則秦無年倍齊首以其祿爲宗人輪租而徐置義田義

學義塚賢恩僉受其益旣入楚所理屯鹽水利正經界繩兼併
多取商無闕出吏無橫歛民困大蘇勒石頌德其冬如京師計
吏所斥虎冠若而人寬小吏斗食以下不問已遷四川叅政治
涪大修學宮而韓亦修學以百金來助爲士學申諭川東雜議
訓涪士民俗爲一變奉檄問指酋楊應龍罪錮之重慶獄中應
龍詭以征倭自贖當事者訊法許之又錮其子可棟而陰行金
四千公家公以聞兩臺言酋反覆狀宜早爲備後數年播事潰
裂卒如公言直指王公薦公才當大任三年考最遷山西按察
使治兵昌平尋徙汾州彊宗聞公來凜凜受要束公增俸浚隍
請陞州爲府以彈壓之平亭獄數十百人已置學田養士爲五
倫集要女經閨範戶說之事具冀南雜議禁著省刑條約及南
澗集中已遷河南右方伯攝行左事汰筦庫宿弊中丞張公薦

於朝而晉人譏其後坐罷歸署所居堂曰敬忍此吾坐右銘也
家距河津一輦可杭慕薛文清之爲人於宋則師范文正程明
道伊川二先生嘗夢明道教之曰澄神心自靜心正神益清已
夢文正教之曰性定天機濶神凝物外清在寧武夢中得句一
廉束兩足平地亦能飛故所至不潤脂膏梁三百金齊千金楚
萬金棄之不顧父以諸子不就養獨將母與俱朝暮上食西鄉
而泣持喪絕酒肉之味苦出三年事其兄若父兄欲析箸長跼
而雷之病則卜禱醫藥不遺餘力輦之游太華元嶽以適志旣
老以高年賜爵沒而哭之哀不忍發其遺藁皮諸別室故舊一
飯不忘報然矢不爲居間有司疾惡如風而不宿怨倣落下香
山與鄉先生賢者月再舉會以朴素退讓表正鄉閭體鴻大聲
吐清暢方面美鬚得癡疾邑令來候披衣起論諸子問後事一

無所答固問曰勤儉何讀四言蔽之矣

馬永亨字子健號龍川世居芝川鎮始以舉人訓導房山旣而知房山縣事性介而政方時有當路令縣以白金易木炭者他邑皆不敢動金亨卽以來金易之當路果嗔劇然廉亨常祿外一塵無緇卒善遇焉旣而二守河間府嘗三攝郡篆庫有羨金亨睨之若浼不近也旣以廉高治中畱都監督織造例有樣段皆麾却之積五襪陟常德府知府人多意其寬成節變年耄戒得也而亨介顧日瑩守常五年適視在房山操觚一日也亨嘗面兒舉人應禎語取受嘆曰吾欲寡之又寡以至於無以此故苦節行於家庭服乎寮案聲稱播於寰區倦勤而歸帝爲加副使銜焉蓋以異數寵之也亨喪配二十年鰥居不置婢宦三十年不一過里閭爲杯酒歡人肯難之故卒之日識與不識羣鄉

之人皆諫焉是豈聲音笑貌得之哉

張邦敬字簡甫萬歷癸酉舉人四川高縣知縣調平山補原武
行取河南郡丞鹽法屯政多所調停丁內艱補順德以循良稱
陞叙州知府叙荒裔文教殘缺公爲刊四書五經於府學安奢
士司叛亂大兵合勦公徵賦餉奏降有功陞安綿兵備副使調
雲南金滄兵巡副使兼攝督學議拔多名士他若革土番私貢
之金勦營伍時閭之規號一方保障陞貴州布政司監軍左叅
政任三月歸里杜門不出推產伯兄撫愛猶子孫捐金葺學宮
置司馬太史公祭田人多稱之

薛芳字德茂少夢屠麟而治春秋辛卯鄉舉壬辰進士宰臨淮
屏奸寬賦水不沒城皇陵災御史按治中使將借以魚肉民公
力主天火以消其患陞戶部主事管南新濟陽二倉得羨餘七

萬石司農考上下擢吏部考功持大體舉朝服其公正轉文選員外母病歸旋丁內艱喪祭如禮調文選時忠介孫公方起喜曰此故砥柱銓衡者也一切倚重六選滿鬚髮盡白終以取怨被論歸甲寅起太常少卿以慈寧宮救劉御史不克發疾卒公爲人剛直而中實和粹以春秋名家卽念劬康公邑吏部象極衛公其門下受經者也

張邦俊字襟黃萬歷乙未進士出鄒泗山先生之門由縣令行取戶部主事河南道御史巡按直隸督學河南湖廣備兵陞雲南布政司左叅政御史時抗言起廢棄廣用賢請太子出閣講學又疏請增浙閩泰齊解額四省各得五人增會試額天下得五十人定爲例議應從祀者一人應補諡者十四人効稅瑄梁永高淮救直臣王邦才等俱載國史

解經雅字岱瀛萬歷辛丑進士汝寧司李執法不避權貴外舉
歸起補汾州召吏垣有六事十苦十失疏以不阿爲時忌遷山
東憲副叅楚藩尋遷山東觀察使卒公兄弟五人俱同胞三進
士一鄉舉一貢長卽公次經傳三經邦四經達五經絃稱一時
間氣云

解經傳字



萬歷庚子舉人明年辛丑佔伯兄同捷南宮初

令直隸完縣東南地窪秋霖漂沒民居墊溺者不啻百千萬戶
乃借民力捐清俸爲開河數十里達方順大河民賴之姓名解
公河四越月移繁長垣未浹月丁外艱服闋補濟源清水利裁
浮稅抑豪強復調郟縣如所以緩完濟者遷兵部主事督武學
武學故執袴蔽悉痛除其習遼事棘奉命赴三邊選將晉職方
郎中亦自旁午應之裕如揀拔大小將一秉至公有京營弁杜

逢春以五千金贄立疏正法賄師風頓息尋以疾歸起爲大梁
叅政儀封王窩賊黨民莫敢嚮邇廉得其狀卽破柱取罪人疏
於朝褫其爵晉保定巡撫時瑞燭熾祠遍海內保定獨無力持
之也瑞敗撫畿南屬兵林馬選邊將尤岱等標下勤王檄詔下
卽抵彰義門外上嘉勞之移軍通州會三屯將楊肇基告急不
俟朝命遣將白騰蛟齎火器助之城得不拔大司馬疏其功第
一晉兵部左侍郎節制各鎮援兵涿督時有覬恒山節者蜚語
潛萌之遂鐫秩歸閉門教子孫於崇正十一年九月初四日終
解經邦字嵩磐弱冠舉於鄉乙未成進士初令嶧嶧田蕪民徒
且盡逋賦至二萬餘公爲請捐積賦緩征民稍集卽爲建屋市
積具耒耜以勸耕計創官莊三百二十七開荒田二千二百二
十四頃有招墾之議十道荒之議十省刑省罰之箴二皆成書

可觀邑承以例羨五百入卽令抵民租至今人尸祝焉移繁大
同制撫駐節軍民雜處號難治公至咸就理報最爲戶主政頒
行籍餼金八百兩畱饗軍入督海新二倉節羨六萬轉儀司卽
時代藩易樹公獨以進退爭得不改出爲易水兵備束鹿故多
盜公至悉平遷山西右布政軍民詣闕畱遂以二品仍駐陽和
尋晉宣撫宣兵素驕按部治之甲皆精入援宣旅冠天下又寧
武援軍離鴈門卽肆掠入疆且囂公以練甲三千壁郊外取首
惡立賞之法以一繡弧導出疆卽疏請天下援兵經過制府得
行法上可之尋加兵部侍郎經略遼東以史太夫人病辭疏入
遂削職歸公天性孝友廉約愛人好施喜讀易及春秋著有儀
曹奏稿撫宣奏議中和堂集

楊建烈字義清萬歷癸丑進士葉縣令授江西道御史甲子秋

逆璫用事周忠介公順昌周太僕公宗建繆太史公昌期皆公同年俱劾璫公隨諸公後抗疏擊之旋以贈公訃歸未幾公出爲叅議璫怒未已先後羅織諸直臣中以危法次且及公會崇正御極事方已召補山東道御史陞大理丞尋陞太常少卿歷左右通政陞太僕卿通政司通政使

閻可陞字達卿萬歷壬子舉人丙辰進士歷行人禮科給事中四川主考督理京營轉刑科右給事中爲人方嚴正色立朝抗直敢言風節甚著有奏疏一卷

衛先範字象極自號樛櫟子父王道篤志理學卽著宗極論者公幼岐嶷不凡遭父喪哀毀踰節家酷貧讀書砥礪不少休頤仲兄先烈衣食之萬歷乙卯舉於鄉出新安呂忠節豫石先生之門先生夢五色雲擁一忠字大可竟天因得公卷已未成進

士令太平華里長易帽例米歲二千餘石及富民紙價銀等獎
百餘兩調繁襄陵斷篆臨汾又擬太平襄有河患公爲造浮梁
民稱之曰衛公橋又加意作人譚經課藝名儒多出其門兩治
民皆爲建生祠乙丑擢吏部主事胥吏假印爲蠹公至首釐之
以不附魏瑞力請假歸家居十二年非公不一字入邑門至地
方利病民生休戚則力爲陳說庚午乙亥間流寇迭至與邑令
萊陽左公議守禦設方略動中機宜今所存守禦策問皆公所
作而諸官紳條答者是也時荒旱頻年公與左侯議刻崇儉書
以挽回之至賑貧醫病雖家無餘畱而日夕施濟不少休偶染
疫疾合邑老幼爲祈禱於神願以身代者至數百人丁丑起考
功轉文選嚴絕私交毅然以簡賢爲己任特取汪公喬年爲督
學左公懋第爲給事又起劉公宗周陳公子莊等十餘人時有

鐵板釘子之謠內瑞馬化龍欲有所託公峻拒之遂以他事中傷左遷貧不能出都涿鹿馮公贈以金始克抵里歸而教授生徒立龍門社以課遠近諸生李賊入關公走河東山谷旋爲所繫時有傳將授以官者公勺水不入口凡六日未幾追餉備極毒刑從未出一祈憐語少閒則力病讀易而已會諸賊敗散公始以殘年得歸居邑北三義莊究心易傳鼓琴嘯歌不問家人產業嘗乘一疲驢布衣氈帽所過市里與野叟相後先人不知其爲故吏部也年八十二終

薛國觀字家相一字賓廷萬歷乙未進士授萊州司理以治最行取遷戶利給事遷兵科右禮科左典試江右遷刑科都以親老歸養上曰何久不見薛長漢起兵科都丁母艱哀毀成禮會巨盜苗美聞韓甚急公以重賞勵鄉兵戰守邑賴以全起禮科

都同試會閣稱得人如名儒陳組殺諸公是也居埶十年孤立
陳奏嘗昇觀以論權璫條陳秦盜舉朝是之澄祭邊海祭虛冒
營將貪酷有司忠讜謗聞於朝野乙亥陞太常少卿上不欲
置之閒官丙子陞都察院右僉都御史清介端方風裁嚴峻丁
丑枚卜拜東閣大學士念上遇恩深雖勤勞不敢自惜尋加太
子少保戶部尚書進文淵閣大學士疏請出內帑捐俸新裕士
馬賑貧民禁藩戚一一從之適遇兵部所選秦中叅遊諸將來
辭公卽勉以忠義授以方略因與共盟誓報國恩諸將皆感激
故一戰擒高迎祥再戰逐李自成羅汝才捷聞上召公侍宴平
臺賜金帛又爲上畫策謂敵強兵弱非奇不勝因草詔諭河南
總兵左良玉陳永福以數千金行反間使自成殺汝才韓邑小
而城頑公通請傳初費不出民五月而工就庚辰陞光祿大夫

柱國少保兼太子太保吏部尚書武英殿大學士提調經筵會試總裁卒

衛景瑗字帶黃渚北村人天啟壬戌進士性至孝母病侍湯藥目不交睫者四閱月任雒陽推官執法不阿峻絕苞苴杖斃土豪衙蠹無算直聲大震授山西道監察御史首劾閹臣周延儒及銓臣曾楚卿救工曹靖科元等按畿輔不避權貴丁艱補河南道御史巡大倉痛革陋規曹璫化淳有所求咤不顧樞臣楊嗣昌議加勦餉公抗疏直斥之謂天下安危視百姓利病今百姓方病柰何以加征益之病省臺王績燦吳執御吳彥芳俱建言被謫公疏請召還弗省傳朝佑李如燦數溫體仁罪上怒下獄公力爲訟寃會召對復極言二臣從國家起見願赦出以作敢言之氣上怒甚罪幾不測公侃侃自如尋調行人司正遷尚

寶司再遷大理丞晉少卿平反大獄二十餘嘗是時公資望隆
甚例當京卿會周再相當事阿其意出爲大同巡撫源已束下
興利除害厲兵秣馬裁缺丁鑄火器戢豪宗戒貪吏虔禱祈廣
賑濟雲人感頌甲申二月李自成東犯太原督臣王繼謨望風
遁公嚴師厲衆布置戰守法議遣重兵阨鴈門險鎮臣妾環觀
望不前及寧武告急公檄催援甚力環曰非信地何公憤然曰
國勢至此尚何論信地耶同舟共濟正在此時傾橐得九百五
十金犒激標丁將親出師卒爲環等所沮不果三月一日賊報
至公方出死戰而鎮臣環從內變賊遂入城擁公至賊營賊衆
叱公跪公不顧向東南踞坐大呼皇上而哭自成善謂曰我米
脂一民耳今日至此天命可知爾真好官爾降仍用爾撫大同
公瞑目曰吾紫君組紱仗君節旄期滅爾朝食焉有從爾作賊

之理賊引公出顧見姜瓖曰賊奴賣我爾朝盟而夕背上帝必殺爾瓖掩面却退賊黨羣勸公盍少委曲公嚼齒奮罵不已越三日復擁見賊自成曰爾真忠臣我且驛乘送爾還家公曰國破何家可歸爾速殺我自成曰我必不殺爾公奮起大罵以頭觸砦石血淋漓被面絕而復甦賊悚然命掖公出公仍大聲痛罵賊瓖黨愧羞甚率不能語然終不敢加害是時公不食已數日矣而生氣岳岳竟不死初六日公行至海會寺南向痛哭且拜曰臣失守封疆死不盡罪願爲厲鬼以報呼二子德祇德敏訣繼母畢於觀音大士殿前沐浴正冠帶自經死死後自成嗟歎者久之給五十金遣人護其喪送還家其從弟景朝葬之蓋忠義之感動如此公壬戌讀禮時從大司空馮恭定公學稱高弟子仕雒爲豫撫范公景文所器重庚午分試山東首拔左公

懋第在臺中程司農公我祥利爲眞御史在大同與朱公家什
交莫逆皆同殉難蓋師友淵源有自也事聞贈兵部尚書諡忠
毅公長身而黑色性剛嚴不可犯人因以黑爲號云

趙春芳字鳴臯天啟甲子舉人許州學正陞長葛知縣永就國
賊圍許芳方署州事固守賊曰汝降令爲刺史否則城破且碎
汝骨芳曰吾食君祿爲賊臣乎賊怒攻益急城破大罵死之

李國琮字象坤庚午舉人河南許州學正代築滎陽闕倖修城
置火器不逾月大賊雲集四面環攻卒賴保全又剪滅八府通
家蔡和義蔡從龍縣人更生爲樹碑建生祠

衛引文字業嗣生而器宇超邁英碩非常庚午舉人辛未進士
出陳明卿李曉湖二先生之門授庶常晉編修國學司業春坊
中允諭德侍講經筵已與試越中得人最盛陸公培葛公世

振其尤著也時流寇四起海內騷然公方在家居十六年冬李
自成破西安全濟瓦解公星夜起京師勸哭上前言西土之危
將延社稷次第上五疏具陳禦寇方略且捐家資以助軍需得
三千金上召見溫旨慰勞公吳陳勸寇之謀請召諸將翼衛王
室有詔褒勞未及施行而神京失守公薙除鬚髮被緇衣不肯
臣伏賊以前甚嚴知慘刑願死不屈手書寄其子延齡曰吾削
去鬚髮不能卽死罪也見諸勅書以繼吾志耳餘無所言已而
乘間南奔時大學士史公可法奉命督師兩府維楊興平伯高
傑節鎮淮南公以僧服入城史見公來喜甚卽疏公以左春坊
左諭德兼兵科給事中監興平軍西征至開封諸故將之不降
逆賊者兵無所歸多觀望公以忠義禍福指諭聲振河洛兵日
以衆適馬士英忌興平威望恐其成功故促入秦欲以死之公

以興平頗恃其勇武不爲賊備屢書相戒而興平恬不爲意未幾遂罹許定國之刃兵大潰公駐歸德閤部復以少司馬爲公請遂奉命總師共守揚州無何

大清兵至揚州城破閤部自殺公不知存亡或云投水死又謂歿於亂兵又謂以黃冠遜去人尚有於嵩洛間見之者著有館閣試草編纂六朝章奏武經七書六子全書

趙翔鴻字充之元通侯牽奴裔中甲子鄉舉辛未成進士宰武陟解組降淮安檢校寄居廟中止飲淮水陞太平司李丁內艱補保定調順德皆以不殺人媚人去鼎革後屢徵不起平生真心實行終始一節疾篤自爲誌銘稱處士云

衛楨固字屏君少負奇氣性孝友而喜談兵畱心世務崇正癸酉舉人甲戌進士授開封推官承平日久時流寇剽劫梁宋間

民不知兵驚惶奔走數十里不得至城邑多遭殺掠公議築西關城處之間以事經南陽汝寧河南諸府皆量其地宜城者勸民修築且出俸金助之既成呼爲衛公城又舉城守事宜十三則奏記上官上官奇其才凡有警檄公與謀公戎服據鞍一日夜率行數百里按視城壘修守禦所過扼塞險易悉一一識之以故賊不能犯而執法如山判決如神丰裁嚴峻有衛青天之稱時流寇猖狂督撫以李白成羅汝才故欲盡驅西人出城商旅之在開封者不啻數千百將罹死地公抗言若是則推官應先去以推官陝人也事遂止所全活甚衆辛巳以卓異徵召對中左門力言今天下民窮半以兵半以歲諸臣惟戮力勦寇寇平則無殺掠之慘時和年豐而足用故平寇爲足國第一要務惟雲南道監察御史首劾中樞玩寇督鎮戰守援兵入城又謂

中州形勢宜分兵萬人爲二營一駐襄城應南陽一駐陳州應汝寧以爲守汴計次年巡按畿南真定諸郡數請蠲逋賦恤饑饉又請正驕兵悍將之罪請革津遼米豆及俵馬之害又數檄沿河州縣安輯河南民之避寇者全活數十萬人事聞再畱巡按一年十七年春賊逼京師李建泰師出命楨固監軍事割京營三百兵隸之行至真定昌平失守焚十二陵享殿欲還軍救之命固守良鄉涿州都城陷疾趨保定行至大石橋遇賊數萬騎與戰射傷賊甚衆賊少却復益兵圍之公突圍出投井井水淺不死爲賊所執賊攻公不知所終

高辛傳崇正癸未進士初授大理評事

國初改諫垣遷少京兆提調順天鄉試中使送兩生入闈辛傳片之風節著聞歷官工部右侍郎韓故小邑土狹民稠資食於

延綏各路亂後盜賊出沒芻粟不至辛傳疏請設神道嶺防兵
奸宄不生商民俱便韓輓餉潼關二百里苦不堪役再疏請免
邑人立碑以志不忘

李化麟少有文學家貧常傭書里中得館穀悉以奉父母崇正
癸未成進士改庶吉士順治初授給事中晉省民上言某地有
礦願備資開採廷議將用之化麟力言不可上疏寢其事居恒
謙厚接物至大義所在不可干以私有罪犯應死者持白金求
營脫嚴叱之曰殺人者死天可欺乎其清正如此

本朝賈宏祚字永錫順治丁亥進士弱冠能文邑令左懋第極
器重之性孝友嘗以祿養未遂終身不置酒張樂不衣裘帛篤
愛二弟嘗捐置義田以通賑恤初任章邱令疑獄立剖旋丁外
艱服闋補尉氏邑舊有報墾田六百餘頃爲民累宏祚躬行勸

課稅額始辦內報歸再補元氏推御史封章數十上其舉孝義
重師儒一疏尤剴切出視長蘆鹽政商人例餽金悉屏弗納嘗
按部所屬餽黃金飲器正色叱之差竣還京請告歸杜門謝客
登大耋好學不倦所著有西臺奏議巡鹽題稿龍門臥集等書
子締芳字懷伯讀書勵行少從盤屋李頤遊學有根柢聞父道
左令軼事心慕之爲搜輯遺稿以崇儉一書付梓年三十六卒
所著有思誠錄

解幾貞由行人歷江南提學僉事力持古道不諳流俗受業左
公之門文學淹博

衛執蒲字禹濤順治辛丑進士初授新樂令請蠲荒地賦額三
千緡時郡邑徵賦以銀七錢三爲額執蒲請從民便悉遵市值
收錢歲省民財萬餘金流亡漸集邑稱樂土尋遷戶部主事督

理通倉盡革收漕諸弊廷臣交薦授雲南道御史有請裁所歸
驛并復設延安巡撫兩疏皆闕大計旋出視浙嵯廉聲特著西
南方用兵秦民困於飛輓執請用水運可自楚直達漢中不
私交便歷僉都通政先後疏凡數十上二十七年奉差祭告南
海道拜左副都御史以病卒於廣州

衛秦翰順治辛丑進士少孤育於伯父景瑗瑗死闔難兵燹相
仍旦暮不給秦翰閉戶力學成進士後猶莊誦如諸生時授靈
壽令民田水衝沙壓戶口逃亡逋賦無著前令率被劾去秦翰
至遍閱災地詳詢疾苦請令祇納本年正賦巡撫惡其擅將劾
之檄太守親勘勒令開征秦翰不率令太守怒杖吏且荷校以
脅之秦翰曰不開征一吏死開征則百姓死矣言詞剴切太守
亦心動秦翰又繪圖謁巡撫備陳流離狀哀懇不已巡撫惻然

入告永裕地糧二千六百有奇自此歲豐民樂邑無逋賦遷中書科中書二十八年擢禮部主事歷郎中尋出知龍安府下車卽革里民供應陋例在任九年鎮撫苗獠結以恩信所隸三十一司皆輯服以年老致仕歸數百里中多泣送者

劉蔭樞字相斗康熙丙辰進士性至孝事親先意承志視羣從如同懷值歲饑盜起里黨多不給爲貸粟賑荒築堡以守大河自縣東北南出龍門山中兩岸絕壁鈎挽莫施蔭樞冶鐵爲柱索舟緣以通又勸募冰石補修補谷坡及城中通衢邑人士爲建祠立坊時初任龍安縣人諒垣章數十上如論秦豫兩省事宜及楚省勾稽等事皆周大計旋出分巡贛南除私收門稅又米市有新舊米二種舊米蔭樞計歲入置田以租充額牙稅永除擢雲南按察使尋改授滇海秋漲爲害請疏之兼建六河

岸間蒿蕘有餘堪燒舍不足葺以席棚不蔽風雨爲捐俸廣
增號舍內外改觀並除科場行戶諸累尋撫黔甫至釋苗紳之
流繫者數百人會烏蒙威寧土苗構難蔭樞與滇蜀會勘傳檄
召之詣省素服蔭樞恩信率衆偕來諭以德威諸苗帖服遂釋
去黔中四塞皆山鳥道盤旋馬莫騁也爲開馬路二千餘里滇
水則大修橋梁行人利賴至今猶尸祝之黔省人文蔚起辛卯
科特疏請廣解額六名又令郡邑各設苗學漸有養雋者五十
四年赴巴爾坤周馥軍營又屯田塞下歷三年還京師六十一
年與千叟宴雍正初賜金歸里年八十七卒所著有周易蓄疑
春秋蓄疑梧垣奏議宜夏軒雜著行於世
陳朝君康熙壬戌進士事母至孝與兄弟叔姪三世同居友愛
甚篤初令蒙陰重學校嚴保甲革行戶蠲稅設催科紙皂吏民

安之朝君聽訟明決嘗於省會一日審結十大案臺司皆器重之擢戶部主事外省奏銷例有私餽盡斥之尋陞郎中視學中州號稱得士

張延樞字景峰叅議顧行之子性敏爽嘉獎士類由壬戌進士陞授翰林日講官乙卯典試江南其所拔識率多名宿得人稱最盛嗣任督學亦如之歷陞刑部尚書持法平允有盜倉庾者十數人已擬死樞以例得不死力爭之遂得免後以事歸里

廉能

明程時建字大河嘉靖甲子舉人任萊陽令創修邑志多惠政誌名宦嗣陞成都判後數十年而左公令於韓乃爲文以祭之曰浴日之邦第生其間聞諸父老公令是頒惟公而直直則惠焉余登禹門咏蔽芾篇

李燦字斗明萬歷戊午舉人天啟乙丑進士授兵部主事陞戶部郎中守汝寧政得大體流寇薄城公與遊擊朱榮祖設伏執殺盡殲之民賴以安調平陽捐俸修城致仕歸以追餉執至河東曰此吾舊治也何面目見父老乎遂自縊

吳永圖號慎菴萬歷丙子舉人任山西榆社知縣均徭聽驛興教化出沉獄百姓愛戴如父當事以過信民貧苦攷居下第歸之日民泣不忍舍行李蕭然以一人擔之而去歸著書自呼農逸者四十年年九十一卒生平學有本源泊然寡欲無喜怒之色性好謫人孜孜不倦人稱慎菴先生蘿石左公誌其墓以爲有道仁人蓋不虛云

薛國彥薛儀十一世孫萬歷辛卯舉人知晉州永平府同知俱祀名宦進順天治中戶部郎中兼攝四門倉解任脫靴鼓吹聲

徵大內陞保寧知府深山窮谷皆建生祠有薛青天薛活佛之
稱歸里以俸餘八十餘金置義田五十餘畝

孫美字厚俗治書經明景泰四年歲貢任直隸古城丞居官廉
私交廉正自矢故邑土肥百穀宜播舊無麻公自韓載種教以
樹藝漚紵法至今世食其利號爲孫公麻三舉清廉崇祀名宦
一統志云清貞剛介一毫不取秩滿貧不能歸士民餽錢以贐
堅辭不受古廉吏不能過也

劉自新字銘菴梗村里人端正好學善古文萬歷六年歲貢任
邳州同知愛民勤政百姓戴之爲立祠陞東城兵馬以不諧俗
罷歸里居讀書教授者四十年壽九十終

薛際昌辛酉副榜拔貢司山西絳州訓導直指門役係絳人毆
辱諸生公執法論之直指怒誣參學憲袁臨侯先生繼成賊皆

公出入得旨發刑部嚴訊繼成名臣其事得雪公誣亦白反稱公大有風力不奈斯文應補知縣以親老不就

張進昌字任宇邦敏子敦敏爲諸生有聲辛未歲貢司鐸四川重慶攝安居黔江縣及辛平武不罰一鍰民戴若慈母如指倖儲備審編減丁開寬獄絕賂金其尤大者聞變後隱居不出日閉戶讀書諸生受學者甚衆邑侯劉公兩至其門求一見不可得淡然寡營文墨外無他好尚少能緩急人賑饑施棺略無德色晚家落斗室蕭然不蔽風雨坦如也有雅量喜怒不形人以陳太邱擬之李因篤爲之作傳

薛起鳳崇正丙子舉人性孝友撫孤姪孤甥督課不輟甥後舉進士有名起鳳初任黎城造耕織具教民農桑值歲儉勸實卽爲請豁又採山開蜜制器以利永久其建置類多實政改任筠

連抵任只攜蒼頭一人以供掃室執爨之役士民服其清正卒於官貧無以殮民爭致賻扶柩以歸且建祠祀之

劉蔭楫字濟川大中丞之弟也邑諸生以招流議叙補夾江令首重學校捐貲重修郭外有毘陵堰督居民築之溉田百頃餘民稱衆母陞賓川牧先是雲南趙州三處有回龍銀廠一所開廠者三四千人爭訟數年具控制台隨批賓川州審結楫斷決清楚兩造心帖三四日回覆廠人焚香署門大唱佛聲而去識者謂若水新猷與鶴州舊債蓋互相輝映云

范光煒癸酉舉人知內鄉愛民出以樸誠民相訟輒委曲化導使自悔悟梗不率者始刑之卒於官百姓哀號感慕爲之建祠本朝李振麟順治丙戌舉人初令臨武臨邑自賊首曹蕝子盤踞積年人民蕩析城中茅舍百間盡屬兵營振麟方招撫逃亡

稍集臨舊有二十四里兵燹後流移過半丁糧不均振麟力請於上官編爲十二里侵隱之弊一清邑境與粵東接壤逼近猺崗振麟練鄉勇八百人立練總四名統之扼要設守諸猺不敢犯界考績擢中書舍人以母老乞歸母壽九十八振麟慕終身張雲桂字天馥叅政公之元孫招流議叙知縣之鴻之長子也以諸生入貢銓平涼府訓導叅憲黃公謂有經濟才委署衛事徵屯糧補階州訓導階爲古武都地鄉試鮮獲售者桂力請於郡牧置學田立課期日夕淬厲文風丕變士子登科甲者踵相接後擬諭文縣侍御何公諱宗韓甫應童子試桂一見器重加意栽培卒獲鵬搏及任鳳陽時何公已爲廬鳳方面謁見時必延入內座執弟子之禮補訓河州值大兵山寨軍需旁午奉委分勘河州邊戍二十四關皆要害地或無兵或兵少深以爲患

適有廣文入

覲條陳之命遂赴部引見圓明園卽以二十四關地險兵弱一奏對

憲皇帝深嘉之

特命陞授武職辦邊務以腿疾辭授陽湖主簿奉委解輯山東水患流亡百餘人盡心撫馭俾各沾實惠尋陞鳳陽丞以古稀致仕歸閉門靜養十年不出並不投刺公門三膺鄉飲大賓

文學

後周薛裕字仁友端弟也少以孝悌聞初爲大學生贊中多膏梁子希嗜學問裕獨研殫之不倦弱冠辟丞相叅軍事嘗曰大丈夫當聖明之運而無灼然文武之用爲世所知雖復栖栖皇皇徒勞苦耳京兆韋履恬靜有志操裕數載酒肴相候談宴

以爲賢妻以從孫女卒贈洛川刺史名士多誄之

元郝鼎臣字巨卿號北山韓之干谷里人也性敏識博文重當時金泰和八年試京兆擢巍科哀宗正大六年己丑守商州洛南縣是年十二月元拔韓城七年庚寅元兵掠鼎臣東至汴元太宗七年乙未鼎臣歸韓原十年戊戌試京兆府三登魁甲已而行中書省遷充本省叅議兼管京兆府儒學提舉學校事十年謝政其在汴也元相耶律延款四方之士而鼎臣與焉鼎臣詩曰大道分明有殺機干戈未定更何之寒枝欲發無根蒂憑仗春風次第吹釋斯詩也蓋欲隨世以就功名也顧售之不達旣雖典教而終不與政何耶

明孫嗣雙樓村人少授詩書屬文中正統丁卯舉人入大學歷事大理授四川夔州府同知從學河東薛文清公之門

張元善字純菴鶴齡裔孫生而穎拔讀書積學嘉靖乙卯應試
長安出闈後偶如藩司見設鹿鳴席者熟視之曰吾當坐第四
位耳人咸駭異已而果然隆慶戊辰成進士任清苑令陞成都
府同知丈駿屯田督建宗學不受餽金土司作亂時據濱張公
正撫蜀公爲盡秘計告捷推順慶知府行部分司中夜燈前有
陰魂鳴冤者蓋皂役謝經所殺也次日一訊卽服立斃杖下閭
郡皆驚以龍圖稱之以善書名世在蜀有高大光明字刻山壁
長安文昌閣嶽廟萬壽閣傳之公筆文名雄甚稱關中傑士著
有紫雲稿

梁元帶村人登萬歷丙子鄉薦自稱山人仕懷仁知縣博學善
古文工詩賦著述甚多亂後無存

張士魁字文宿芝川人司徒公從弟十七補諸生丙子登鄉薦

三中所副馳名藝苑兼善古文詞藻瞻典蔚然儒宗考試都門
日所稱爲總羣言之三訣爲天地之精華者是也授新鄭縣令
陞威州刺史歸博極羣書與少保公共修六書賦而韓城縣志
則大半出公手云

解惟一字守中張村里人少讀書固覺寺獨坐一室手不釋卷
補邑諸生益肆力學問而屢試不中久之歎曰學止舉業已乎
乃開館授生徒日夜訓迪嘗謂學以明道文期主理無理之文
非文也遵朱子集註詩傳凡偏駁詭異之說屏不爲觀門下士
近百餘人遠邇負笈者爲築精舍居之解中丞公經邦晉處士
君寶王萬泉賈子大任皆其及門生平重廉節喜忠孝樂施舍
每面折人過而復平恕慈良門人聞其賢於朝大宗伯馳錫儒
林爵以風多士晉龍盤爲之傳

解經達字守和辛酉鄉舉起家
中書舍人遷戶部主事出守袁
州與張芑山爾公先生遊爲刻
所著述稱賢能簡川北道闕變
以追餉死平陽

衛王道字宗極渚北村人邑諸
生少治易與解明亭吳慎菴二
公讀書紫雲觀以性命相切磋
嘗謂讀書非取功利事卽以文
辭表見亦豈儒者每究宋大儒
語錄危坐求之或走深山俯仰
冀有所得居龍門空谷偶觸老
氏言謂通於易自號龍谷子已
而悟曰入元矣易有太極非是
之謂也更號宗極子平生言動
不苟正襟危坐雖兄弟妻子亦
相敬如賓客家酷貧環堵蕭然
處之自如邑令馬公攀龍督學
許敬菴先生雅重之著有宗極
論得周元公微旨子先範峻節
清風能傳家學左蘿石先生誌
其墓尋祀鄉賢

解經鉉字恒蟠贈司馬公少子生而穎敏岐嶷諸兄皆謝爲不
及顧累試累蹶會朝廷詔天下士極言得失公上書數千言帝
深嘉之後爲司馬所格罷去尋以拔貢終公人文玉立詩格淹
雅自成一家善鼓琴書法二王而出之以吳興山左翟公氣蓋
一世每折節於公臨終日夢之帝所甚奇未幾卒崑山徐相國
元文爲誌墓

解引樾字拙存嵩盤公子天啟丁卯經魁戊辰進士授翰林編
修爲人孝友真摯雄才博學不可一世癸酉丁父艱哭走出都
行泥中因成疾家居數年闕賊入關欲以死報君念老母在堂
而止隱居大華龍門間讀書不輟稱韓山樵隱或龍門逸史與
楊州姚公思孝時時往復絕口時事有遺史二老之目始公授
庶吉士文爲東鄉艾千子先生所重海內翕然誦之亂後杜門

謝客尋山問水每多吟詠而故國新亭青山白髮一箱之中每
三致意焉載酒問奇執經請業者趾相錯也所著有素位篇華
遊草名勝志澹園稿諸書自爲墓誌銘以終

晉賓王字德明別號龍盤世晉陽洪洞縣人元季諱楨者避亂
渡龍門而西寓秦之韓原明初隸籍薛曲里遂爲潘莊晉氏十
數傳至百歲公崇化爲公祖化生者賓惟一爲公父於前萬歷
乙未八月六日篤生公幼端嚴不與俗伍十餘歲從健吾解先
生學先生器其品以女妻之年二十爲禮學洪南池識拔充邑
庠弟子員方壯志希望賢漁獵今古潛心性學與余並太史解
州存衛秦冲其終火龍泉寺雖風雨罔替焉後聞恭定公馮少
墟先生倡學關中書院卽同古絳辛復元金明趙廉夫負笈長
安詣拜下風遙志肄業不輟洽陽令中天范太乙先生重其行

禮請西河講院有持百金夾托者不應本邑主河東蘇弗如先生慕其雅時請教有勸以乘機討債者不從父母捐館苦塊晝院不內室六年處兄弟怡怡終其身無間言待人仁慈義氣當爲鄉鄰抱還棄女給金撫養之至若婚窘葬窮苦力不贍者或老幼無依不克成立者胥憐之由爲之地昔范文正公喜施與擇其親而貧踈而賢者咸惠及之公庶幾其近之已因施致貧家事中落敝衣糲食晏如也逆闖據西京衡文取士公守義不出潛龍盤書齋校文課子著有乾惕錄四書詩經不悖集龍盤集龍盤吟等書抒自性靈俱足不朽矢志林壑絕跡城市閒來手植修竹幹栢以適性情其高節清風類如此順治庚子年六十有六卒

張鼎銓號羅南大父邦敬歷官叅執有美政沒祠於鄉父遺囑

舉明經張故望族又明經善治生遂以貲雄於里羅南生而修
偉既補諸生則好爲詩古文大放厥辭不必盡衷六藝之法竊
獨斥然自喜也是時北幽文文公傳經青門山左左文信公來
令韓羅南以次遨遊兩公稱高弟子馮翊間莫之敢先者國變
乃稍稍講劍術遊俠之事思有所爲輒不就罷王少司徒來用
總餉秦中雅聞羅南名辟爲掾屬因以轉輸如蜀會大藩某得
難女贈之異其狀問之爲前督學園中尹公孫也憮然曰是豈
可良久則又念返諸藩所恐終不得全乃佯受而歸於路卽呼
尹若父事我誠從者旁豎一榻而躬與諸健兒周還其間諸健
兒雖佯諾心甚疑之旣又相與竊笑其迂凡四十日至漢上更
擇人以禮嫁之於是諸健兒始大悅人人歎以爲難至有泣下者
抵家凡二年貢京師授定西訓誅茅築室糾諸生講業其中盡

傾先世之遺資佐供具兩視邑篆皆有能聲當攝定西時吏某主郵金不集白易其貂貸之徐察其困遂折券比代吏民攀號遮行與諸生相望更三年調五原會觀察上谷陳公來備兵蒞官之明日盛具車徒往見羅南先生會大雪羅南方高臥黔微戶外陳却立移時臥始覺起而班荆畱飲甚原父老見者皆殊驚歎以爲數百年未有也羅南亦自謂觀察公知我而交日進居期陳移雁門羅南起令蜀之威陽欲無行走謀於陳陳爲之治裝間聞達威威數遭屠戮靡有孑遺城市沒荆棘中豺虎嗥閭相聞從者皆悲曰此豈人所居者獨怡然觴詠不輟而多方紓其流民甫數月成戶皆完乃捐苛法一切務爲簡易遇民有利病則令人人竭誠言而就中權其可否斟酌往還疊疊不倦久之皆爭詣令如父子之語家政若士有來學者則躬自

教之於是入其邑聞絃歌之聲矣節鎮知其賢檄料民於他邑
不矜己不任名不恤浮言上下皆以爲允當是時蜀新造之邦
奏計京師苦無章程而皆遣吏庸書於邱遂多訛謬並坐逮赴
訊西曹久始得直乃竟拂衣去旣抵舍遂堅臥不復起卽居第
旁別創爲祠伏臘享其大父而以世父平武君與明經配焉諸
從子孫有貧無依者咸撫之如己出韓人多之乙巳冬卒於家
羅南爲人孝友好大節然性頗嚴片言不合則叱咤風生其鄉
人往往憚之居平多讀書著祿園諸集俱行世尤工草隸所至
必有遺跡遠近爭寶之子之涵之澄之淙涵與澄皆卓立能文
狀類其父

本朝程必昇乙未進士任棲霞知縣善詩文閉戶讀書不見官
長己未徵博學宏詞著有白石堂集

新編縣志卷二
三
吉庚字月三康熙甲午舉人五歲失怙恃有言及者卽哭泣不
食順事祖父母迎養孀叔祖母叔久病事之如其父少有文譽
康令君績修邑志採訪商確之力爲多學最淹博而文則抒之
以性靈一洗塵氛之習與王巨庵性同契科同榜文齊名門人
呂守謙錄其文稿而合刻之

王養大字巨庵性行質厚文亦如之弱歲食餼卽思及整飭先
世之墳垣絲毫不以入己卒從其志於今望之堅完而森秀者
人皆知其爲餼廩所積也早負文名試嘗冠軍晚益沉俊登甲
午賢書與吉孝廉庚爲文酒之歡稱莫逆

呂功字守謙受業吉孝廉庚之門奮厲讀書抗志古人有實踐
力行之功以康熙辛卯入泮旋膺秋薦捷南宮任安縣令三載
而罷安士民爲之保留餽贐又爲之建坊立碑遲之十二年而

誌入名宦其循良之績蓋有卓然可紀者矣平生敦倫紀砥名節崇品概見利思義積而能散解組歸行李蕭然家徒四壁立既乃舌耕晉土以其修餘給戚屬之乏自謂一生可自信者內不欺心所不見棄於邦家遠近者祇以不敢存不肖心行不肖事存爲善之皮毛而稍異於流俗臨終自爲誌曰以存真吾也所著有四書皮談知非吟

丁蔭璧字子瑜貧而嗜學每有會意處輒欣然忘食文名藉鄰邑歲癸卯以選拔膺鄉薦任鳳翔教諭嘗訓士子先品行而後文藝在任數年勤於考課每自制一藝以爲式無不老靠切實風士多所造就能自監品長於帖括者皆其教導之力也其後數十年因修省志徵名宦邑人採其口碑流傳者五人而公與焉

孫龍竹字渭川幼失恃家貧郃邑王黃湄先生其舅氏也器其
才招之從學潛心汲古每至廢寢食及門諸英雋莫之能先也
弱歲入泮諸名宿見其文驚曰有如此雄才我輩難與爭鋒矣
課試於邑遇得之有命題云命者道之微權也吳令君評云先
儒都未道及此其後學逾篲聲彌藉劉大中丞張大司寇咸器
重之己酉掄元隨提南宮授刑部主事以親老家貧授弋陽令
繼任朝城皆以丁內外艱未及期不獲展所爲其爲詩古文詞
雄深刻露直登作者之堂爲其子挾之遊存者僅片斑耳

高世弼字五紘歲貢生孝廉挾之子也幼志儒先之學長遊李
二曲先生之門惇行孝友砥勵廉隅衣冠瞻視斌斌質有文制
藝尚雅潔有反樸還醇之意講學於家從游之士皆循循雅飭
不問而知爲五紘氏門人張大司寇每延之家塾令子弟聽其

講授也同時受業二由者凡四人弼及貢生賈緒芳生員程伊藻監生強嶽立皆儀則端方有品概

張緒字克纘少保公之來孫也受業高孝廉挾之門與孫渭川公爲莫逆之交性疎曠喜同人於財無所吝願以拙於治產屢受困躓而識趣之端正則百折不移於樹衆聚談和光無忤而不隨波爲狂謔每談論古今人文章精神勃發能抉摘其神髓至得意處每欣然忘飢令讀者鼓舞倍生頃城令陳謀瓊山令張榮閭皆其所從受業者也以丙辰恩貢生任西寧教諭署縣事自道憲以下咸欽重之

解含章字可貞博聞淹貫講學龍門書院丹崖唐令每以政事之暇爲文酒之談歲辛亥奉

旨纂修陝甘通志沈道憲寓丹公檄章與其事乾隆丙辰徵應

博學宏詞選張太守奎祥修郡志章採訪之力尤多以歲貢生
司訓南安有諸生程某者爲兵弁汚以賊力爭得雪多士快焉
後任鞏昌府訓所著有南安集乾隆己亥藩憲檄其詩賦入關
中名稿中

衛祖頊字瑞燦孝廉蓋臣之孫也記誦廣博喜山水名勝留心
人物康令修續志膺採訪者五人君與焉所撰有龍門八景入
今志

武畧

戰國司馬錯與張儀爭論於惠王前司馬錯欲伐蜀張儀曰不
如伐韓王曰請聞其說對曰下兵三川以臨二周此王業也今
夫蜀西僻之國而戎狄之長也敝民勞衆不足以成名得其地
不足以爲利臣聞爭名者於朝爭利者於市今三川周室天下

之市朝也而王不爭焉顧爭戎狄王業遠矣錯曰不然欲富國者務廣其地欲強兵者務富其民欲王者務博其德今夫蜀西僻之國也戎狄之長也取其地足以廣國得其財足以富民繕兵故拔一國而天下不以爲暴利盡西海諸侯不以爲貪是我一舉而名實兩附而又有禁暴正亂之名今周天下之宗室也韓周之與國也二國並力合謀以困乎齊趙而求解乎楚魏臣所謂危不如伐蜀之完也惠王曰善卒起兵伐蜀十月取之金薛儀姿貌魁碩倜儻不凡有四方之志旣冠值金末世元太宗由龍門渡河而西儀率居民迎之帝命招降河東北山諸堡衆儀諭之歸者雲集帝喜其能賜以符節俾爲千夫長時河南未平詔儀從河東帥李守賢征之旣而平定命爲楨州守楨州儀之鄉也里閭錦衣人所深願而儀待之卒葬新莊

元趙率奴從元憲宗征蜀以弔魚山功封義副侯懸虎頭金牌
宣差收鎮棧州達魯花赤因家于韓太微官其施也

王應朝豪俠有氣節膂力絕人明季盜起西川一帶盡爲賊藪
應朝直入其營斫殺斬首數級邑令左蘿石嘉其武勇請授千
總防禦有功每遇賊戰則所向披靡一以當百七年賊圍澄城
應朝同韓邵營兵將勦殺力斬數十級生擒數人雄勇振一時
旋爲領兵者忌而殺之蘿石哀之祭以文

聞人

韓城縣志卷七

孝友傳

薛濬字道贖胃之從祖弟也父珍周渭南太守濬少孤事母至孝慕古人之學求師長安江陵何妥見而異之授以經術太和中襲爵虞城侯歷新豐令開皇初擢拜尚書虞部侍郎尋轉考功文帝聞濬孝以母老賜輿服几杖四及珍味當世榮之後母卒詔鴻臚監護喪事歸葬夏陽時隆冬極寒濬衰經徒跣五百餘里足凍墮指瘡血淋漓哀動朝野尋起令視事濬屢表乞終喪優詔不許及至京帝見之改容顧謂羣臣曰吾見薛濬哀毀不覺悲傷濬竟不勝喪而卒年僅四十二時弟謨爲晉王府兵曹參軍在揚州濬作書遺之詞甚酸愴訃聞帝爲屑涕降使齎冊書弔祭濬性清儉死之日家無遺資子乾福武安郡司倉書

佐領志

薛真字伯英少力學長辟椽吏爲渭南主簿以孝聞父病侍奉湯藥多方無效乃於靜夜焚香北辰剔股肉熟而進之父不知其股肉也食之而安人以爲孝感所致云夫割股雖屬國制不旌然人子一念之誠不可令泯泯故志之

前志

師恂儒林坊人孝事二親親歿廬墓三年晨夕哭拜不離墓側縣君賢之爲加冠帶旌其門

馮邦典邑諸生上官莊人父母歿各廬墓三年子諸生馮盛世亦廬墓者

劉皓然字天衢邑諸生同第閭然廬墓賊至不去賊相戒勿近其塋曰此廬墓孝子也邑侯左公聞於上表其居曰二孝子之

門

王善新東少梁人蚤喪父事繼母極孝母病至吮血嘗糞母曰
兒真孝子矣左公旌其門

閩和羹性篤孝父歿廬墓三年流寇劫掠人皆遷避羹獨不去
哭曰兒在此父勿驚後以歲貢歷官教諭

王印芳趙西里人嗣於諸父克盡子道曲體親心鄉黨稱曰孝
子

郭殿者龍門下峪里寡人也未嘗讀書學問心摯孝父客商三十
載母病痿手足不能自舉伶仃窘甚負薪供朝夕值霖雨突
不火者三日僅得錢若干文昏暮抵家求諸隣易米數合躬執
爨伺母食夫妻勺水不入口每出輒囑其妻孝事母妻亦能盡
其心又念父子各天罔極未報因遘疾籲天請代臘月鷄鳴起
焚香拜北斗者三年朔風凜冽不恤也友人雲嶠子錄其事謂

三釜之養反不若百里之負而窮巷淒其之子處仁蹈義終其身不掛士大夫之口行湮沒而無聞者比比然矣野史氏曰余讀郭宴人孝養事實不覺三嘆也嗟乎士大夫誦法聖賢比禮樂明發懷二人尙自愧孔子以宗族稱孝列士之林孝者百行之原也彼能培其原而知所重雖往古孝子何以加哉

謝本軒字慎掬邑諸生幼以孝聞父歿築室墓傍居處三年樹栢成林

趙良相郭莊里人祖母終持齋一年母終廬墓三年父及繼母終俱齋三年

楊宏恩芝川人幼喪父事母能孝撫幼弟成立極友愛縣君題門曰孝無間言

張祚昌東少梁人庠生三歲喪父賴母成立母歿廬墓三年

趙相堯字封庭庠生親歿廬墓三年庚辰饑捐穀賑之邑侯表其閭

李檀諸生平陽守李燦子李賊追餉繫燦至平陽檀號泣隨之侍養不離燦自縊檀以罵賊迎刃死死時年二十二

衛仲堪字勝公江李人孝友篤至母病衣不解帶者數月及歿哀毀骨立不入私室中己卯舉人未幾卒

董士孝邑之細民家酷貧傭以養親嘗爲走文夫每遠出則留顧值之半爲父母飲食資母病祈禱百端至於嘗糞隆冬極寒時懷父足而坐夜則以身溫被辛未饑不能舉火代杖覓錢以爲養仍不令其親知之以爲常

韋四維號仰乾增廣生員彭村人事父以孝聞子四人孫八人下逮曾元共五十餘口聚於一家秀習詩書朴勤農業教家以

忍讓勤儉爲主不肯分爨扁所居曰百忍堂邑令屢旌其門蓋同居者五世云

王汝惠耆民與其弟汝玉相友愛如孺子時汝玉每適田則汝惠親爲之饁子弟雖衆弗使也怡怡農畝問問飲食雖白首不易蓋鄙野之氓目不識丁者

張售珪歲貢康熙辛未旱蝗售珪館上郡迎父就養父老不能騎以肩輿度嶺嶺險峻輿夫不能前售珪自舁父山行數十里父爲嗚咽售珪示踴躍以慰父事兄恭或加詬杖恬受之工文嗜學試輒冠軍邑令延爲學師

解體健順治丙戌進士髫年父病號泣于村社各廟祈代父母歿育於兄嫂後事兄如父歷宰武強龍陽俱著惠政

薛爾昌衛引嘉衛盡目易其親者邑大學生國觀仲

子應中書舍人年十三值闖逆劫兄爾章拷餉昌詣賊願代答掠賊義之幽禁年餘脅之降不屈賊敗脫歸痛父慘死絕意仕進年八十八卒嘉順治乙亥進士明末闖逆入關嘉父之瑄叔之琚堂兄引文悉被執將害之嘉甫弱冠挺身赴賊願代備糧兇慘卒不屈知石首縣值寇發城幾陷嘉率兵民剽平之糗糧芻焚不煩閭左后首至今感頌五世同居課子弟必嚴多造就族黨之好學者蓋臣父先範亦被逆索餉備受慘毒蓋臣朝夕環泣兩閱月得閒以其父逸歸又冒死訴臺司雪弟冤繫嘗構龍門社學邑之先後登賢書成進士者多出其門蓋臣亦以順治庚子舉於鄉衛鴻幼隨父引文宦京邸年十三值闖變引文緇衣南下母張氏死之鴻扶母喪及庶母卞幼弟嵩齡西歸中途夫弟所在抵家葬母訖卽出尋父與弟時南北路梗乞食以

行後知父盡節維揚求屍不可得因招魂歸葬再出訪弟歷四載至蘆溝橋旁遇民家子殊肖父叩之果然乞歸課讀歲辛酉嵩齡舉於鄉族人有從父於難者給田以贍其家周貧恤苦前後損債焚券不下數千金鄉人稱其孝義後以明經授鎮原訓導不赴

程毓槐順治甲午舉於鄉母亡在殯值闖亂村人皆走匿槐與弟諸生毓禎守柩不去賊刃脅之槐禎爭就死賊義之後過其村曰此程孝子莊戒勿犯所居西川里當韓孔道山徑嵒崿每霖雨輓輸不至捐貲開鑿韓人賴之又以西川瘠貧人多廢學爲建學延師課讀來就業者多致科名

續志

高汲引邑諸生流寇亂時爲母守柩不去陷於賊不屈里人以孝義稱之乾隆八年旌表

高巍然字長峙邑諸生順德守來鳳之子也大父庠生原正陷
關賊中巍挺身赴賊被挫辱百端罵益厲賊以溫語啖之卒不
屈而死時年三十一矣其後七十年而吳令曹直爲誌其墓謂
數百年猶有生氣也

強敬業經商爲養父歿營葬鬚髮盡白初家貧以商致裕均與
弟無私財庚子饑私以百金付學博散給貧者居恒以謙謹稱
考授州同乾隆六年旌

解光紳以明經任府谷訓導性孝父患瘍卧牀累月紳晝夜扶
掖中夜執香泣禱香盡燕指不覺瘡旋愈與仲季尤篤友愛
吳普諸生羽聖子聖得疑疾夜數食飲稍拂意輒呵責普方弱
齡中夜數十起家故貧盡則拮据求錙銖夜具饌和顏以進已
率枵腹辛未蝗災母又染疫舉家嗷嗷普供父膳侍母病無少

缺數月亦大病於父母前猶勉爲強健狀叔母以疫死子六齡
普葬其母撫其孤爲之娶婦乾隆二年旌表

孫龍鱗廩生學識開朗克竭孺慕親歿廬墓三年乾隆五年旌
表

陳垣諫嘗商於外忽心悸知母病也卽歸事不忍再出後子以
敬入泮乾隆八年旌表

張七洪貧而能孝中厥抱孝於親篤於弟妹俱乾隆十二年旌
表又趙棟買已田產代弟償債

薛之棟拮据奉親嘗逢災買其子乃遇人贈得金乾隆十九年
旌表

劉大本太學生親亡廬墓天性純篤乾隆十九年旌表

吳性蘭邑諸生少失恃奉繼母如所生於其兄惟馨弟惟蓮終

身友愛從未聞以財物故稍有片時爭端兄年老性頗拗或有呵責笑受之後雖析居每有鮮食必先爲致之爲人篤厚而端方戚里咸欽服焉

吳旭邑諸生性純篤親沒廬墓三年後遇疾風雷雨必至墓所守慰之邑令唐臨其閭曰終身孺慕呂个臣家赤貧母柳氏病且久孤身奉養不倦後爲人傭工每食時先歸奉母而甘其餘主者問知之令臣飽腹而外給其母臣曰不敢先也陳署令英聞其孝賞以金令娶妻奉母匾曰孝道可風

吳遵誥武生兩歲失怙事母極敬母素惧風雷沒後每值風雷之夕卽赴墓所泣慰曰兒在母無恐覩此其事生也可知矣樊璿邑諸生儀節莊雅奉二親省問視膳恒恪謹親疾視湯藥衣不解帶甚至忘寢歲時追薦懸像流涕老而彌虔伯兄病姪

外出時已析居必爲之親湯藥焉其族人樊小前左手瘻口垂
慾水亦貧如洗民之至無知者日嘗挑水備錢以供母又嘗負
母乞食以養之母年八旬而沒沒後值炎暑不時携茶奠其墓
謂已渴母能不渴乎其性行純篤如此

陳謨字臯颺項城令謀之弟辛卯歲饑族鄰多有困乏者以五
十金分別賑恤之平生讀書嘗慕漢

薛包之爲人及與從弟析居時叔父之子凡四人已與兄二人
念先世友愛之誼宅舍器物酌六分勻之其從弟監生詢亦遜
完室於胞昆季焉

文苑字翰章邑諸生事繼母極得歡心家雖貧甘旨無缺同胞
四人苑居次兄弟俱乏嗣於已三子中擇其家者繼之長作又
嗣伯兄幼子作人嗣季弟皆讀書成貢生

張建侯性體篤厚事親每曲意順承邑令石璽曰能養親志
許漸幼失怙母衛氏病諸藥不效漸割左臂進母食之果愈
馮仲珖大學生喜慷慨尚氣誼友於兄弟妹適於楊姑老二子
幼其夫常外出舉家嗷嗷珖爲拮据綢繆俾勿顛終始不懈從
子中有困乏者屢加推讓值歲饑割腴田得五十金賑閭里之
貧竟以好施致困居嘗磨麵治生貧人至其門必減時價之二
文以爲常

薛曰敬貢生幼貧苦勤儉治生旣而家計漸豐於時諸從姪及
其姪皆無藉敬招之同居各授以業兼爲之援例成名

趙元珍幼失怙母歿廬墓三年生員姬鳳岐父歿廬墓三年生
員王天猷母歿廬墓三年

楊作梓少孤事母陳氏敬養備至母素病醫鮮效嘗糞下藥始

愈後因習醫濟人終不計酬也學憲嵇匾曰一鄉之望

張謙慎潘庄人姊適晉氏少寡有女二慎名歸同爨擇諸晉爲立嗣婚嫁事皆力營之並給以宅焉

馮克讓太學生馮溫生嗣子父有腿疾讓延醫百治事繼母勤慎里無間言邑令黃匾曰克念天顯

衛實奉親極孝生事葬祭誠敬無間父病歷險延醫嘗得神佑又嘗沾不他鄉遇賊將奪所負實泣曰米無幾也奈老親餓死何賊憐之放還家

史帝輔大學生自其始祖大仁著有齊家規一編世相傳守及輔七世家有八十餘丁和睦合爨學憲汪匾曰百忍齊芳又武舉趙紹先者自伊太高祖士顯至其子繼述七世同居又馮有福自伊祖至有福兄弟四人子孫繁衍翕然和讓不忍析居

劉參星年二十失恃後又喪偶遺一子遂不娶孤身事父敬謹者六十年邑令張匾其門曰孝義維風

張祿兄弟四人祿最少父以食指繁遺命析爨後痛諸兄衣食缺乏悉令合居已嘗辛苦以佐兄讀其純厚可知矣又生員孫復翼與堂叔元瑞析居後叔破所分業翼商諸兄弟仍給以產劉緒良監生同堂兄弟四人而已孤生析居時田產所多推讓不執兩分之說里人義之

李如梅東少里人家貧年八歲父出外貿易不知所之年二十尋至湖省光化縣父已卒卽扶柩歸里竭力營葬後以晝舖生理不時歸家省母嘗囑妻馮氏不可違忤或不聽母訓卽出之母歿哀痛盡禮歲時追薦必備物焉年六十始再娶生四子今八十二歲

義行

党孟輅千谷里人嘉靖己亥歲里有逋賦衆不能辦議他徙以
避夏楚輅聞而尼之乃捐三百金代輸焉里衆感周急聞於知
縣如昂榜諸邑門以旌之嘉靖乙卯歲秋霜殺禾冬地又震輅
有粟三百石貸者不能償輅悉出券焚之曰歲厄如此不忍相
迫也鄉黨聞之共頌其義又夜嘗有竊衣帛者家人覺而縛之
旦視則菜色人也輅不訊而釋焉事傳遐邇人遂號爲党義翁
一日暮歸遇禦人者於鵝而坡勢將被執問輅語駭曰乃党義
翁也各避易去至今里巷相傳以爲侈談云

程萬里字翼鵬號鳳山性慧知詩以增廣生爲國子生方事涉
獵而二弟天遭侄典與幼萬里獨拮据恒產裕如也久之爲平
陽府知事爲寧波府經歷身雖遠外而家政遙制者嘗秩然其

誨典與學也殫厥心力察典質令爲國子生令與卒業爲舉人然給與金視典不減也萬里子五侄二財產三分之卽宦積俸餘器用亦不自私而三分之宗族稱敦焉鄉黨稱懿焉余嘗亡其宅見遺器之均也嘆薛包之行於今再覩焉是可廣教矣故傳之

賈淵世居邑城一日晨山遇一少婦家失金銀泣覓於路久之不獲執淵拾其遺且云銀關軀命淵素長者憐其急以妻銀給之後婦折衾獲前失銀偕夫詣淵謝且償淵所給銀喧動里閭邑令王鼎聞之推爲鄉飲耆賓

高旻寺庄里人元韓令三世孫通詩書易三經屢科不第隱居閭里從學者百餘人值歲祲旻蒿日不忍捐粟賑之時縣宰李欲移稅課局於城中旻以菜園一所慨然捨焉異日自父任歸

視一稚子塗哭詢其故哭者曰吾母孀居暴疾卒殯葬乏資柰何爰出路費三兩助之後二孫高嵩高瑾俱膺歲薦壽九旬終梁民養邑諸生帶村人崇正八年流寇至民養携家入砦自保寇圍攻急度不能全泣跪其母衛氏前母自裁因手刃其妻衛氏並一十五歲室女有三子遣之去遂自刎死未幾砦陷邑侯左公石公俱旌其閭子伯鐸後以歲貢顯

衛昌開壬午副榜有奇才國變後與其房師顧公咸正去遠遊不知所終

薛敬禮郝莊村人正統七年歲大饑出糶糧五百石賑貧奉旨旌表立碑本村卽方伯太常之五世祖也

韋鑑彭村人正統時饑出糧五百石賑濟奉旨旌表

韓九福謝莊里人荒歲輸粟七百石賑之而焚其券正統時賜

名品服色

王伯益明正統七年同弟經益炳益出粟五百石賑饑有奉旨旌義之碑

程景芳正統七年賑粟千石奉旨建坊

白簡柳村人宏治二年饑施谷五百石賑貸有碑

高愉邑諸生已卯副榜爲人雖儒者然性勇敢敦尙氣誼崇正已巳歲饑民不聊生公爲惻然奮起曰此時不能救人於死雖日談經濟無益也急市城中垣地得百金趨縣堂以賑濟事告縣宰曰生願耶若貧士焉得爲此公曰吾固貧然貧在家不在心也令奇之爲請於上建有百金尙義坊後因流寇無慮日衆以公才勇而正直推請爲韓邵營守備以子貴贈侍郎祀於社公少受業長安馮司空之門故能卓然自樹不負師說如此

孫必達字成章一字非聞甲戌進士授臨潁令丁內艱補邯鄲華儀馬節郵傳修學官折獄尤明閭變後遁跡岩阿長吏求一見不可得杜門不出者凡三十年

陳佑聖崇正丙子舉人嘗以百金濟歲饑化導鄉里整飭約規凡開設酒房務賭博者有嚴罰里人遵其約規迄於今不替闕變後隱居不出

張京瓚康熙丙午舉人素行孝友事姊唯謹篤友誼辛未蝗災捐穀數百石給親族不足更鬻產濟之宰慶都民乏食力請發穀麥以貸復緩征又捐俸置學田士民刊有實政錄

張顧行康熙丁未進士幼山嗣孝於本生父母撫從孤子孫興業師許某之貧歸其喪於中州壬申關中大疫顧行歸自黔陽遇流離滿路沿賑無虛日抵家毀飲器典衣物妻薛氏脫簪珥

佐之得千金糴粟散賑全活甚衆自縣令至督叅政廉明特著
衛靖中字羽明天啟丁卯經魁唐縣教諭歷河南推官闕後
隱居不出

孫沅字元圃雙樓村人諸生鼎革後高尙不出爲人剛正有節
概不信星歷能以禮正俗尤重然諾慷慨雄激嶽嶽動人有故
紳以事籍其家妻子入旗公易田產得百餘金贖之而與紳初
不相知也負笈訪友徒步遊江淮客死白門所著有野史刻之
以傳皆記明士大夫屈身從闖而彈冠授職者

陳紘康熙庚午副貢幼聘於程旣而女失明女之父不安於心
則就而議退焉紘父生員一德不以爲然而未能白決也商諸
子縉曰始聘時此女未嘗失明也我家不願彼將安適乎父曰
兒之言是也卒完娶足徵學識之過人矣後以鎮原諭陞西寧

府授署西寧縣事子嗣寶入泮

劉士藻字潔齋譚馬村人增廣生受業安邑曹鎮予先生之門性磊砢峭岸與人寡合人亦莫敢近也甲申後絕跡公府稜稜孤立教授生徒以自給日贖不火髮如也有勸之仕者則曰吾受全歸全得爲清處士足矣時號曰勁節先生

強景琦字營如諸生居北關性孝友受業曹真子馮恭定二先生之門逆閹變後高尙不出

強秉乾字乾若諸生居北關隱居宜川者三十年

李湛不字澄源諸生薛曲里人讀書力田高尙不出足不涉城市年八十卒

李鶚字雲衡諸生薛曲里人高尙不出

楊青芝川人諸生高尙不出

尚姬雖諸生江李人高尙不出家素饒悉散與族人爲歲時祀
先用自作黃冠遠遊方外暮年始歸

陳璠國學生字仲玉康熙庚子歲大荒家頗有積粟日與其二
子分赴集市出糶之歸而詢及某某困難支則曰不善治生故
至此可不慎乎終不言已意以嗜酒得陡症口不能語而卒啟
篋視之則爲金寥寥無幾母曰吾每見於夜間在我所夾銀成
碎塊包封之而未問所以也比及歲稔登門完趙者以漸而至
計金二百有餘無賑簿可稽嘗乘驟遠出夜醉而歸仆於地遇
數賊人至其前諦視之則曰此陳家伯也扶乘至家然後醒因
問曰客何爲者其人具言不諱爲具酒食勸以正厚爲贈而別
其後以孫謀貴贈彰明縣知縣長子士偉邑庠生鄉飲大賓封
彰明知縣次子士偉監生皆淳白長厚孝友嫻睦之風傳乎閭

里

王廷訥字可道號行一早失怙兄第三人貧無貲訥竭力經營不辭勞瘁漸致豐裕諸子姪皆令讀書游泮登科者濟濟一門都憲公杰其尤著者妹氏家貧爲之輸租以給耕鄰有欠債不能舉還者卽毀其約有族人舉喪無葬地以已地給之無德色也邑令劉延爲鄉賓

吉維前卓立村人初家貧兄弟商於豫至呂家潭於厠上拾銀五百餘金卽候其處有客倉皇而來詢之則遺金者慨然與之客欲分餽其半維曰如欲分也豈候汝哉客愧謝之維兄弟五人式好無猶後成巨饒喜施予又有晉錦者拾三十餘金於城內候其人至卽付與之並不白言其姓名又監生陳城內拾二十餘金卽訪遺金者與之

薛之桂城內人有張姓女所買婢也蓄養七年及笄矣女父來見之意甚盛桂卽面毀買契令携歸擇良匹焉有西原地四畝王姓原業也舊買於桂後伊葬父母謀地不得桂問之慨使歸贖再讓價數十金其人戴之贈匾以旌其德

王炎如諸生邑有王藉者炎如贈以貲生理於外藉死其子八齡炎如慨爲搬回其柩養伊妻母並教其子讀書至二十餘年其平日助人棺葬濟人苦難盡好行其德者亦可謂敦古處矣師貞克貢生井湓村人也其先世周急濟困歷有善行及貞克慷慨好施更慕爲推解之風壬申歲大饑充首請於官自設廠於鄉於村南法王廟以食邑之饑者日千餘人已卯歲又荒亦如之其叔文珖家素殷實充並勸其增廠施粥全活愈溥衛霍貢生性曠逸嗜游覽尤好施子急人之難乾隆甲子秋無

禾里多通欠霍代翰之戊午歲饑僅霍出米設廠減價以救之
他如茶亭義塚折券諸多善舉則里中人往往能言也

張元棕貢生芝川鎮人尙義好施每歲饑輸金濟貧一十五年
有宜川楊姓與妻里氏携幼子逃至鎮寓旅店皆病數十日無
貲以還主人因鬻妻於邵陽人痛哭旅所棣聞之代還所欠卽
安置別所給衣食後與銀十兩令歸家其人感德謂如再生
李廷選乾隆十一年出谷三百石貯社倉又捐建審倉一座邑
令唐詳請八品頂帶以旌其義

薛芝邑之耆賓也庚辰歲有延長李生被堂兄誘夫婦至韓北
關而欲買其妻芝孫增生名獻聞而責之伊兄覺遂移八仙鎮
獻卽夜起歸芝慨爲置宅且衣食之令讀書後李旋里食餼今
已入貢矣又生員楊宋鎮值歲荒有鄰人段姓者欲買妻於外

鎭爲毀價契給薪米養之終免離散里人稱義焉

王被徵張少保家僮也幼從少保畧知文字事主忠順闕賊陷京師徵詣少保墳哭叩曰僕從上食先朝澤久今主之主已崩僕不忍苟生也不食數日而死

王忠監生王廷璽之僕也初幼主湘讀書俱父喪之嚴也而逃之忠則泣且訪飲食俱廢三晝夜得而見之携以歸復俱主責之嚴也哭勸解免後湘每夜讀則忠常伴門外間卽苦勉之雖風雪未少離也主憐之則泣對曰僕承主恩四世此不足以盡僕心且何以見數世主人於地下耶湘後入泮里人咸稱之曰忠可謂忠矣

韓之士民尚義者種種不絕當闖賊之禍縉紳追餉死於山西紅芝驛者則王秉乾代父俊民衛引昶代父拱宸衛鞏固代弟

植固衛景瑋代從兄景瑗趙光運代父趙濂劉廷相代父永祚
高巍然代父來鳳解宗仁代子居易解光纓代父引標解光纁
代父引樾皆間關毒苦爲親受戮碧血千年首邱無地固可哀
也其諸拯人於厄施粟施金修理助建者則解嘉猷以數百金
救人急難馮雲鶴爲義學義墳陳棟捐金助修學官又捐金施
穀諸生王宏任以垣房一區爲太史公春秋祀又歲於濠水設
橋以便行人義民薛廣歉歲給貸鄰里重給物價及避人盜禾
義民解執中歲饑施粟施棺人稱解佛邑令魏公舉鄉飲曰非
是人不足坐正席壽百歲無病而逝舉人陳佑聖以百金賑饑
楊福厚歲荒施粟二百石濟衆諸生劉士髦歲荒割腴田易數
千金糴米賑饑柳奎先以麥舟貸鄰里不責券郭家興賠納本
里逃戶糧十八石張斗宿募金砌司馬坡建芝陽橋諸生徐州

牧儒士張奇以薛廷梓孫儼孫章奇孫繩緒楊建章薛孟祥孫
世家同天寵孫榮宗輸穀救饑諸生陳經傳蠲免租課王垂正
輸粟數十石煮粥賑貧生員衛之琛施金築渚北城施穀豆數
十石濟衆燒去文券賊至亦稱善人不犯其家生員郭文桂出
百餘金爲里甲支差役序班楊進輸粟救貧輸資助餉諸生孫
一鶚出金給軍戶之貧者爲義倉以禦荒郝莊諸生薛光遠以
六十金買劉李二民妻被掠者於流寇又易產贖河東生員任
之奇任之玠妻於賊營諸生薛乘龍孝事繼母施醫藥義塚葬
孤貧順治中晉人有以良家女轉賣韓爲倡者龍以三十七金
贖嫁士人又晉中一令因事實其孫爲韓人奴龍貸金四兩贖
令歸清澗白足長託妻寄子內外十餘口龍爲給薪米者九年
延安楊尙書孫婦病死周原堡不能歸葬龍爲具棺衾以騾車

歸之王文資母卒不能歸土龍爲葬之至拾金不昧者又有張
喬金計八十兩孫毓菽四兩武祥佑三兩孫昌杰三兩文券一
一百兩又王珽尙於南都會買杭綾二十其主誤送四十珽方
他出經月歸卽召機戶還之一時稱爲義士綾價每疋四兩計
可八十兩

本朝

師貞充附貢生井湓村人也其先世周急濟困歷有善行及貞
充慷慨好施更慕爲推解之風壬申歲大飢充首請於官自設
賑施粥於村南法王廟以食邑之餓者日千餘人已卯歲又荒
亦如之且嘗教其子彥公曰昔范文正公做秀才時卽以天下
爲己任汝曹欲繩祖武萬不可少此襟懷以故彥公舉事常以
遭訓爲兢兢歲戊戌韓飢彥公卽出粟五百石以賑之又建祖

祠割地若干畝以賜卹里黨立法數十條以獎勵讀書做義田而法較周詳韓之人咸以爲有先世之風云

師文琬監生井溢村義士也每有施予從無吝色已卯歲飢家無餘粟捐銀三百金以賑之全活甚衆邑侯聞於上憲旌其門曰義篤鄉閭戊戌又飢其子元遂亦捐銀三百金以續先緒藩憲富旌以一鄉善士所以韓之人咸以爲世濟其美云

流寓

宋楊春絳州人神宗朝以武畧授延安路兵馬都監佐韓范二公出住鄜州以青苗法忤宰相挂冠歸寓芝傳因家焉

元王明字子開號龍溪文中子之後居汾水北固鎮宋末金初募壯士自衛世祖南下率衆歸之以收服西延平慶功勅賜金符封鎮西軍民元帥開國元勳鎮禹門子二長用賢世襲次用

璋登鄉薦知棹州擇姚莊遂定居爲籍

方技

宋房寅家世龍門居西莊北井湓村相傳爲楚之屈姓三閭大夫原死三子俱入秦一處耀州更姓孫隋唐徵士孫子思勉其後裔也一處蒲城仍本姓一在韓城更姓房者是也寅爲人容貌古朴善禁呪之術年一百一十歲解去墓在文嶺之陽宋真宗病疽諸醫藥之不效一夕帝熟寐夢一神人怒目巨睛乘蛟龍御空下一紫衣童子仗劍執卮前爲導已而神人以水噴之者數四未幾香汗淋漓頓覺體輕如無病者然帝問卿何人對曰臣家韓城居槐栢相抱處帝大喜封禪每憶夢中事欲作記而未果一夕復夢神人至乃以禮款之且謂若起朕於沉疴幸進而教之復詰其姓氏家居歷歷陳之已而不見遂詔訪所居

果得韓城北槐栢相抱地爲梵神之域因勅建廟以祀之對號法王歷代以來香火日盛每歲清明報祀者凡數十村澄邨諸邑亦皆建祠疾病痛楚禱輒響應焉

明郭文英韓人也少爲人牧羊以戶匠乏人至京抵役朝夕肄規矩黽黽繩繩久之以巧力聞爲作頭自是見知世廟每一工竣則序勞晉秩累階至工部右侍郎賜三品服色足爲鄉邑光寵矣而韓之人尙嗟山川之氣毓不爲臯夔而爲工垂亞流云

仙釋

劉仙不知何許人修煉於橫山居石穴中白日飛昇後人名其穴爲古仙洞

元薛致元至元間修煉太微宮朝廷聞其有道術詔對賜號太霞真人及金冠臨終作辭世頌

姜善信趙城人世祖在藩邸召見卽位三徵奏對多所裨益龍
門建禹廟賜建極宮命奉香火封靜應真人

吳翠巖授道於游搏霄得全真術又得王玉陽秘訣通周易喜
與儒者交遍訪名山至此以爲勝地居石洞中不畏寒暑嘗聞
朱子敬齋箴知修道真訣聞孟子存心養性事天旨知默朝上
帝無過於是洛陽祿權爲序其徒郝淨元刻碣山中

明郝淨元洪武中創建橫山觀師事翠巖真人每兀坐石穴中
一日獵者逐雉入穴啓衣覆之跡及問雉所在答以無有獵者
嘆曰淨元欲仙再待數年言已忽不見久之郝羽化去傳有秘
書在石碑穴下爲人去取

國朝通賀韓城人少嗜浮屠學剃度後卽師事鑒如聽講楞嚴
法華諸經三年盡得其義聞

世祖設龍華會於五臺首往受千佛戒至京止憫忠寺會
文皇后達和選名僧誦經通賀與焉

后既愈

賜紫衣一襲時名僧報恩卓錫江南遂南遊問道瞋目跌坐者
七日豁然頓悟西歸閉關藍田之寶泉寺歲旱禱雨輒應甲戌
臘月整衣沐浴說偈而逝續志二氏之言儒者不道然其清真
寡欲卓然塵外視世之稱說詩書而趨勢利若鶩者反爲異端
矣錄仙釋所以愧吾徒也薛文清公曰汨沒於聲色貨利之場
何道之敢言信夫信夫

壽官生員陳炳正員王養熙生員王知微劉雲鳳俱於乾隆元
年恩賜修職郎

壽民

程仲載北隅里人爲人孝友敦義讓喜施捨形貌朴拙精健非常壽一百二歲

孫環范村里人正直好義壽一百三歲屢舉鄉飲耆賓

解執中張村里人壽一百歲

衛之璧壽一百一歲雍正十三年旌給坊字曰昇平人瑞

高乙坡底村人壽百歲村中有碑

壽婦

解氏賈世成妻趙村里人好行善事壽一百五歲左公匾其廬曰人瑞石公匾曰百有四歲

薛氏王應車妻東少梁人年二十二夫亡守節孝親撫子壽一百二歲

薛氏陳守分妻未及笄守分商於外十餘年不歸傳言已死氏

待年既久父母翁姑欲更嫁之氏堅持不從至二十六歲守分歸竟完姻生六子諸孫五十七人人以爲受天之祐云壽一百有四歲邑侯魏公匾表曰百有餘歲

馮氏杜文策妻壽百四歲乾隆二十四年旌給坊字曰貞壽之門

屈氏任御柱妻壽百有七歲乾隆二十一年旌給坊字曰貞壽之門

段氏鄉賓李維斗妻壽百有一歲邑令婁匾曰壽比松筠府憲張匾曰閭範永貞

韓城縣志

韓城縣知縣傳應奎文軒父重修

汝陽人

永寧縣訓導蕭宗思履中父忝訂

汝陽人

人物續傳

文峭字西周相李里人生而穎敏從父庠生少峰遊學長安講解輒見大意年十六失怙事孀母至孝受業於史大章之門奮勵讀書手不釋卷每有會意輒欣然忘食文名藉鄰邑弱冠入庠旋食餼雍正乙卯舉于鄉性疎曠于財無所吝家雖極貧凡族里有喪葬婚嫁弗能舉者罔不竭力助之及就教職授富平縣教諭嗣陞蘭州府教授歷官二十餘年諄諄以躬行實踐人品心術爲急務月課外立尊經輔仁敬業三會時加勸勉遠近受業者至庠舍不能容以故燕冀秦中成就人材甚衆其監

理蘭山書院也更請建文章專祠嚴立條約以身先之并素所
整理兩廡儒位先後丁祭牲牢樂舞以及官察班次綱紀所關
俱有詳牒是以見重于各 憲屢蒙保舉公悉以不勝牧民辭
頌才畧素裕回事輒發歲辛丑番獬獬逼近金城口獻呂寧
陵城守事宜佐理王方伯隨宜防守城以無虞至晚年入理彌
遠著述益精取歷代理學語錄文集擇其切要者增入大全發
明性理者增入近思錄切于日用者增入小學又取五子精義
輯畧諸書凡有關於四書要義者彙成一帙名曰四書大成稿
藏于家可覘所學矣乾隆甲辰卒于署壽七十五沒之日棺衾
不具公素謂吾別無以遺子孫祇是圖書數篋耳信夫

雷見龍監生帶留里人慷慨好施遇歲荒歉輒煮粥賑饑量貴
減價惠周閭里一見于康熙辛丑一見于雍正乙卯朱唐兩邑

侯扁其門口利人以德誼敦桑梓嗣更捐穀三百石獨建社舍一所出數十金用周閭里窮乏之家脩修職卽八品頂帶鄭色侯又以善行施濟表之洵范魯遺風哉

張宸綬鄉飲耆賓孝友端方人也嘗救荒恤患惠周鄰里善排解薰其德而善良者數十人更深木本水源之感爲張氏祖若宗創修嗣宇以時俾全族同祀敦宗睦祖合姓感激其他如勸脫囊修西營諸善果固未可枚舉矣

吳聯捷太學生芝川里人孺慕之懷根於性始凡事稟命父母先意而曲體之有同胞二女弟待之勤懇周至衣食俱勝已反馬後不時迎歸一堂藹藹博膝下歡一甥孤貧養育于家倍加恩愛長十餘歲有不知非吳氏子者乃父好施予捷遇鄰里貧乏濟以柴米有族人佗僚歸寧之穴并捐地葬之其父後得狂

疾嘗禱於神願以身代母卧病床褥加以疽痢醫藥莫效乃吮膿嘗糞叩首額天出血撲面如是者六閱月及父母歿號泣絕而復甦至於數回即至六十餘歲但聞人呼父稱母輒涕泗沾襟嗚咽不能自己象陽萬家咸以爲孝思不置云

阮文浩宏高子繼耆賓宏久嗣躬耕力田以資菽水父母年皆八袞老昏且癩至不知飲食浩揣慕倚至以時調饌多少適均宏久嘗出外遇水草玩美忘返勸歸即肆怒罵浩百方作兒戲態乃歡笑而旋便溺在床必親澣濯夜侍側衣不解帶父母呼即應一切不假他人手如是者七年如一日也前任邑侯周修韓志時鄰里欲爲呈舉浩涕泣不從謂事親人子本分事况我實不孝而以孝聞是盜名也因不果報迄今潛德彌彰矣

薛峻德韓城薛庄人工繪事至性纏綿好讀孝經及古人勸孝

諸書家極貧年至三十寄居便村升泰店以繪畫爲業婦省不出三日閱二載其父入山採樵傷於虎伊聞而痛絕移時方蘇號哭徹日夜竟成顛狂時時欲入山尋虎復讐母懼其再傷于虎也使人嚴禁之乃自圖一虎耽耽逐逐肆其爪牙實貼壁間拳撻足踢氣力既竭暈倒在地其母急使人掃除紙虎潑以銀硃作血淋漓狀俟德醒誑之曰虎已被爾撻死矣讐已報矣其狂疾由此方瘳迄今二十餘年偶見畫虎猶涕淚交頤焉德既葬其父念母衰老遂去升泰店依依晨昏跬步弗離母病嘗湯藥調飲食數旬寢不安席又每冬恐母畏寒鷄鳴必起燃柴薰榻以爲常今其母年近八袞旣壽且康孝養之所調攝者大矣哉